



## LA "STAFETE DES LENGHIS MINORITARIIS" CUL SPORT SI PROMÔF LA NESTRE IDENTITÂT

In Europe a son tantis lis iniziativis sportivis che a cjapin dentri ancje plui minorancis insieme par promovi la cognossince des diviersis identitâts, par esempli la *Europeada*, e tal passât *You!MM* e *Euroscola*. Altris minorancis europeanis a organizin events sportîfs par sostignî e fâ cognossi i caratars distintîfs de proprie identitât. I Frisons a organizavin la maratone di patinaç *Elfstedentoch*, lungje 200 km e che e tocjave 11 citâts, cuntune durade di passe 2 zornadis. I Ocitans a àn lavorât ben par rindi visibile la lenghe ocitane tes Olimpiadis Invernâls di Turin dal 2006 e un altri progjet che al à judât a rivendicâ un ricognossiment de lenghe al è stât *L'Occitania a piedi - dalle Valli Occitane in Piemonte alla Val d'Aran in Catalunya*, une cjaminade di 1300 km in 70 dîs di viaç. Ancje te manifestazion *Rugby d'Oc* intune formule originâl si metin dongje partidîs di rugby e musiche ocitane. Pai Bascs l'event plui cognossût al è la *Korrika* che, nassude tal 1980, e je une corse a stafete di 11 dîs, che si davuelç dilunc dai Paîs Bascs par plui di 2000 km cence polse. La corse e je inmaneade par promovi l'*euskara* (la lenghe basche) e coinvolzi tante int pe sô difese e pal ricognossiment dai siei dirits. Sul model de *Korrika* basche, dal 1997 in dut il Paîs Catalan si cor la *Correllengua* che e smicje a slargjâ l'ûs sociâl de lenghe in ducj i setôrs de comunicazion, a fâle cognossi a chei che a vegnin di difûr e a rinsaldâ i rapuarts tra i diviers paîs di lenghe catalane. Par solit a partecipin plui di 200.000 personis. La edizion 2018 e sarâ tal mê di Jugn. Tal 2001 e je nassude une version de *Correllengua* ancje in Galizie cul obietîf di inçressi la riflession su la situazion de lenghe e la impuartance di meti in vore azions specifichis par prudelâl, ma ancje di sensibilizâ la societât e soredut i zovins su chestis cuistions, metint dongje la riflession linguistiche cun ativitâts divertentis e interdissiplinârs. La manifestazion, che chest an e je in program tal mê di Mai, e dure 11 dîs. Plui informazions su chescj events si cjatin in "*Gol - La lenghe dal sport*", di Federica Angeli e Priscilla De Agostini - ARLeF 2010.



### IN FRIÛL LA STAFETE E COR PE FIESTE DE PATRIE

Dopo dal sucès de prime edizion (di Udin a Sapade), a acompagnâ la Fieste de Patrie dal Friûl che la cerimonie uficiâl si davuelç ai 8 di Avrîl a Voleson Darzin, e je tornade la **Stafete des Lenghis Minoritariis dal Friûl**, manifestazion sportive promovude de Regjon F-VJ e de ARLeF - Agenzie Regjonâl pe Lenghe Furlane e coordinade de Associazion Maratonine Udinese, par ricuardâ lis identitâts linguistiche presintis inte Patrie dal Friûl.

E je partide **sabide ai 7 di Avrîl** di place dal Cjapitul, a **Aquilee**, e dilunc un percors di 118 km, e je passade pai comuns di Aquilee, Flumisel, Rude, Cjamlunc, Dael, Visc, Palme, Gonârs, Cjasteons di Strade, Talmassons, Bertiûl, Codroip e Vildivar, di dulà che e je tornade a partî **domenie ai 8 di Avrîl** par Morsan des Ocjis, Cordovât, Siest, San Vît dal Tiliment, Cjasarse, San Zorç da la Richinvelde, San Martin dal Tiliment e Voleson Darzin.

La Stafete e vûl rimarcâ in maniere simboliche la impuartance des diviersis identitâts linguistiche presintis inte Patrie dal Friûl, cu la presince di atletis furlanofons, slovenofons e gjermanofons di tantis societâts sportivis no agonistichis, che a puartin tant che testimonî il test de Bole Imperiâl dal 1077. Il sproc de manifestazion al è "**La nestre Patrie, lis nestris lenghis-Naša Domovina, naši jeziki-Unsere Heimat, unsere Sprachen-La nostra Patria, le nostre lingue-Our Homeland, our languages**".

La sperance e je che, edizion dopo edizion, ancje la "nestre" Stafete e cressi adun cul spirt identitari di cui che le cor par puartâ indenant cheste ricjece speciâl che o vin te nestre regjon.